

余山

山

集

續

集

徐杭遊草序

南州李明睿撰

六經皆序事之文也易以道陰陽書以道治亂禮樂以道中和其所序者卽陰陽治亂中和之事也至於春秋以道名分不言善惡據事直書而褒貶自見尤爲聖人序事之至文焉豈獨詩以道性情爲當序事哉說者曰詩本人情該物理風雅頌興比賦六義俱存豈獨序事乎余曰不然詩三百篇皆忠臣孝子怨女征夫流連縈繆感懷而作其間無非直寫意中之事而情與景皆在其中豈如後人之爲詩者置自己之性情而拾他人之糟粕生吞活剝捉摸求詩之謂耶故謂之曰序事非誣也六經而後善言文者莫如司馬子長善言詩者莫如

杜子美今觀其文與詩有一非序事者乎八書十二年表七十諸紀傳篇篇序事至鄜州同谷遊東西川客梓州次雲安移夔州入湖南以及寓居耒陽而卒其集六十卷首首序事但人不及詳察耳自嚴羽高棅論詩以爲風雅不用議論不必序事不知三代以來凡詩之妙者有一非議論序事者乎今之作古文者止坐此病間有議論而不能序事故文遜前賢若詩則尤不能序事以致勦襲堆砌無一字可觀反號於人曰我能詩我能詩嗚呼陋莫甚矣夫其所以不能序事之故則以胸中原無定見特因一時登臨贈答不得已而有詩耳不知詩在人性情骨髓裏不在皮膚口舌之間故惟忠孝人能作忠孝語也今試取陶謝王孟錢劉元白郊島諸人

之詩一一細心讀之議論中有非序事者乎特人以風雅二字蔽銅沉溺使自已性靈不能發見陷入尋常窠臼中遂至老死不得出頭耳今何幸得方子爾止一洗此陋乎爾止自弱冠卽以詩名世將三十年其平生所作不下五六千首今刪去其半猶存二十四卷曰僊山集亦可謂富於詩者矣世人讀爾止詩或稱其氣格雄渾或稱其音節和暢或稱其用意曲折種種不一而吾以一言蔽之曰妙於序事而已往從吾家叔則處見爾止北遊草卽驚喜曰今日詩人中安得有此人乎恨吾老不及見耳踰年爾止來邦溝訪余於舟次余喜欲狂而爾止卽出其徐杭遊草屬余序余觀其遊徐詩不必有戲馬放鶴等字而知其爲徐州作也其遊杭詩不必

有六橋三竺等字而知其爲杭州作也徐杭間山水友  
朋並皆佳勝其登臨詩必序其山川之興廢贈答詩必  
序其交情之新故一字不肯虛設蓋天下之景多同而  
情各異情或同而事各異爾止妙於序事故其詩千態  
萬狀無一字相同良有以也余往見人送詩輒閉目不  
觀曰此中原無物何必拾人殘唾獨見爾止詩不覺神  
魂夢想如在蓬閬間然後知真詩自在人間我自無緣  
恨相見之晚耳爾止爾止幸善自愛文之神妙莫先於  
詩一戰作氣再而衰三而竭余之文正當衰竭之時而  
以序爾止方張作氣之詩能無汗顏然生平愛此等詩  
慕此等人恨不得見今旣見其詩矣見其人矣安能默  
默已於言耶况爾止把筆爲我訂詩不特推敲中波數

字而已今而後吾願以風雅一席專奉爾止他人不得而攘臂焉故拈出序事一說以爲詩家之標準至其龔山命集之意則有叔則兩序及諸公序在且非論詩之要故不書

徐杭遊草序

錢塘吳百朋撰

予讀爾止先生遊草而歎爲有道之士也今遊道窮矣  
貪吏攫金肥家不念綈袍故人而客子發怨憤之言廉  
吏潔已遠害不能骹法以徇私交而客子亦發怨憤之  
言爾止工於詩車轍所到逢迎固多然蒯緱落落亦復  
不少及觀爾止詩多相成之言無相怨之語雖其友窮  
困屈辱樂之而勿去非以窮困屈辱爲樂也窮困屈辱  
不足以動爾止之心爲可樂也爾止非有道之士乎哉  
今人平居握手相慕悅酒食遊戲相徵逐援青松指白  
水以示信一旦臨小利害輒去之且乘其危急加排擠  
焉爾止不然方予待罪吳門爾止投一械諄諄以二豎

爲念無他詞也及予對簿石城僦居卑濕湫隘之地爾止造門急欲一見又諄諄以喪明爲念無他詞也人之無良不問貪廉槩肆罵詈聞爾止之風亦可以少媿矣蓋爾止爲人脫畧坦夷蕭疎恬退世不能用其材爾止亦不屈以求合無所抒其意則往往從酒人俠客旗亭蕭寺以及名山大川春樹暮雲酣嬉流連而不厭故遊屐所至無論達官貴人高僧貧士賦詩贈答咸得其歡心卽後生小子寸長足採亦欣然獎進不倦爾止非有道之士乎哉予嬰沉疾纔作吏卽中蜚語平生故舊無一引手者且加謗焉獨爾止相見歡好如昔謂人生壽命幾何富貴利達皆朝露耳且飲酒且作詩因勸予梓其近什而予亦序其徐杭遊草云



徐杭遊草題詞

吾友龔山氏自少言詩立意便能堅定獨以大雅爲宗以自然爲妙一切纖巧華靡破裂字句從不泚其筆端垂三十年守其學不變而日造堅老純熟衝口而道如父老語桑麻不離平實却自精微他人視之乃在千仞岡頭可望而不可卽蓋學與年俱進詩益以至焉非一日之故也竊歎爲詩者初闢新奇或爭險譎硬語盤空愛句靡割及其幡然改轍求風人平易之旨而從前工力置之無用之地詩雖近人力不敵矣龔山三十年晦明風雨山水友朋朝斯夕斯飲食燕樂於斯憂愁患難於斯如行遠者無岐路之耽玩禪定者絕外緣之紛擾雖欲不登峯造極胡可得也龔山詩可易言哉余欲論

龔山續集

紙光題言

定龔山詩久矣而奔走南北苦不暇一日示余徐杭遊草遂書其後云

江寧紀映鍾書

爾止詩天真爛熳觸手成妙近代無此詩人觀者但賞其流利圖美不知爾止錙鍊甚工但不使人見鑪錘之痕耳昔人收得白傳詩藁改竄塗抹有數易稿而成者豈但逢迎老嫗耶余比之天親之註華嚴龍樹之論般若誦之使人樂聞讀之惟憂句盡蓋於此事中悟一乘圓機得無礙智慧視世間雕鏤色象皆辟支果也彼但以流利圖美相賞者慎勿以知詩許之

海寧范 驥書

龔山續集 徐杭遊草

皖桐方 文爾止著

顧有孝茂倫

同學 胡介彥遠定

李枝翹條侯

丘象隨季貞

五言古體

和東坡先生除夕三首

同和者安福康小范莆田林青仲晉江黃俞邵江寧

倪開公是爲  
已亥元日作

餽歲

貧家寡所親鄰里亦相佐  
殘年室屢空居積無一貨  
丈人有好懷餽遺不在大  
隻雞籬下縛雙魚盤中臥  
真意

曷忍違留之供客坐荒厨開宿醞細麥出新磨可以恣  
飲啖諒無醉飽過叩門者誰子吟詩索予和

別歲

去年遊北塞迢遞歸來遲風塵徒自苦悔咎莫可追今  
年返南國卜居淮水涯娶婦得稚布宛如賃春時飢寒  
願相守不敢慕輕肥仕宦豈不榮遷謫良可悲有酒且  
召客爛醉君勿辭請看明鏡裏容髣爭先衰

守歲

少小雙瞳子閃閃如金蛇行年未五十倏有薄霧遮精  
力未應老其如憂患何今夜燈燭前妻女慎勿譁聽我  
寧戚歌復作禰衡搥仰視中庭星參昴忽西斜聞雞尚  
欲舞壯節恐蹉跎惟有篋中詩異代猶可誇

彭城訪李觀察溉林先生

古人重感恩一飯且不忘何況被明德沾濡十年強使  
君昔爲令乃在我鄰疆凜秋扇仁風草木皆春陽顧慙  
葵藿質何足當寵光猥蒙君盼睐禮遇非尋常飢則餉  
之粟寒則衣以裳凶年免溝壑寶荷君壺漿六載君考  
績徵爲尚書郎相送皖江口惜別情徬徨明歲至都門  
一見喜欲狂煖酒濯我塵假館息我裝聞我有家難惻  
焉心暗傷聚首未旬日旌旆復南翔彭城我舊遊山水  
風所詳恨未遊覽遍從茲得津梁我戕放鶴亭鬱鬱黃  
茅岡摧殘燕子樓寂寞逍遙堂願得陪公譙附名於篇  
章勿謂隨陽鳥年年爲稻粱

贈徐州守王吉士

昔者蘇長公曾爲此邦牧膏雨潤畎畝惠風吹草木是  
時澶淵決河水蕩平陸懷襄實可憂公親操版築城郭  
賴以全生民食其福又有張山人卜居南山麓公樂隱  
者風時時造茆屋至今放鶴亭高文尚華煜公去五百  
年乾坤幾翻覆豈無循良吏誰能繼芳躅賢哉王刺史  
物望冠羣族昨歲來綰符善政不一足河伯爲安流兆  
民咸悅服我適遊彭城冒昧未敢竇君出吾兄門師友  
義最篤不忘知己恩推愛及骨肉飲我逍遙堂夜雨聽  
絲竹重吟二蘇詩古道宛在目

從楊士佳索四賢詩

每上雲龍山先謁四賢祠四賢者爲誰唐則韓退之曾  
叅武寧幕表爲州節推宋則蘇子瞻出守熙寧時是時

黃河決衝突城幾危賴公捍禦力至今黃樓垂其友陳  
后山抱道隱茆茨公薦爲教授儼然儒者師又有楊龜  
山理學宗濂伊始仕郡法曹小官亦不卑四賢本殊產  
俱宦遊于茲徐人高其風崇祀永不衰楊生千載後懷  
古興遐思旣輯四賢文又輯四賢詩合梓成一編可用  
爲羽儀我昔遊彭門頗搜山川奇見此欣欲得君適去  
江湄今年訪君廬握手如故知連朝飲我酒杯竿何淋  
漓借問四賢詩云胡不見貽

爲鐵佛寺僧題募疏

有客來彭城苦無棲泊處旅舍豈不多喧卑難以住城  
南開元寺鐵佛名最著其地甚弘敞其僧皆淡素况近  
雲龍山可以恣閒步但恨禪室少客來僧卽拒東偏餘

五楹廓落似荒署若以屏間之窄小轉多趣僧云食尚  
乏那得修飾具所願諸檀越各捐少許助左右分兩間  
相對爲門戶更設几與榻事事得所措向後嘉賓來皆  
可送此寓幸勿吝涓滴合之成雨露

武林呈范僉憲正

范公昔爲郎奉使來舊京秉性好風雅又復好友聲所  
以衣冠士望之如蓬瀛我友顧與張與治恢生衰年困柴荆

方春逢雨露草木含滋榮石湖有邢叟孟貞六義研頗精

其詩數百篇散落同野苹公爲表章之遂成千載名是

時我南來聞此肝膽傾懷刺一往謁辱公倒屣迎且謂

子宜序所愧人言輕明旦卽北轅遥遥抗前旌枉駕過

羈旅厚貺無吝情古道今寂寥此義何崢嶸厥後二三



年分司越王城峻比南峰高潔比西湖清外臺寧久淹  
立召爲孤卿我適遊越州涉江采芳蘅與公咫尺間安  
忍恻然行停舟叩幕府乞酒澆塵纓

題鬱林石

友人吳錦雯埋吳郡迎其尊公靜肅先生來署中一日于墻陰得片石異之諱

觀其上有鬱林石三字疑卽三國時陸績所載也靜肅舊爲粵令以廉著愛玩此石有同心焉

此作因贈

東吳有前賢姓陸字公紀嘗爲鬱林守廉介著青史歸  
時患舟輕載石充行李及其抵吳郡石棄於淺水吳人  
重風節樹石表公里猶恐他石溷鑄刻使不毀迄今千  
餘年此石竟湮矣我友武林生除授吳司理迎親至官  
舍羣花爛如綺散步行花間低頭摘芳蔬偶然得片石  
隱隱峯巒起其上有三字雖晦猶可指當年陸公舟所

載恐卽此誰移郡齋中想亦大君子若翁曾令粵秉躬  
嚼不滓郎君筮仕初亦以廉自矢此石久淪落遇合非  
偶爾吳陸古並稱賦詩張厥美

留別諸駿男文學

臨安風俗儉好客者殊少卽有同心人禮數仍草草正  
如杜陵詩一飯跡便掃諸君本貧士滿腹富文藻曾遊  
江淮間果得名譽早前日聞我來盤餐遽傾倒今朝聞  
我去又復集朋好此意獨慙慙欲別傷懷抱秋飈何謬  
謬秋月何杲杲把酒送歸人相思白門道

蔡子虛員外月下招飲賦此謝之

孟冬天氣晴霜葉下羣樹貧家罕人事炙背當軒戶忽  
聞叩門聲云自蔡水部貽我詩一卷其名曰郎署辟如

秋水澄不受纖塵污更妙是篇首耻借達人序自題三  
五行樸直見真趣詩後有尺書要我今夕聚皓月懸中  
天流光勿虛度薄暮杖藜往壺榼已先具所約皆名彥  
討論惟詞賦不似宦遊人酬酢拘禮數臨別謂今夕安  
可無佳句歸來與勃然聊以學君步

荅沈方鄴見訪

憶與若翁交乃在廿年前曾遊敬亭山館舍欣相連一  
日一過從情分何纏綿是時爾總角風骨秀且妍喜與  
豚犬子同生癸酉年我笑謂若翁兩世俱豪賢匪獨結  
弟昆還結爲姻緣亡何逢世難陵谷倏已遷烈士誓捐  
軀不肯命苟延至今宛溪上麻沈名並傳聞爾年旣長  
文采果翩翩吾兒亦能文蚤歲歸黃泉念此肝腸摧不

金山續集

卷之三

忍通寸箋今冬爾南來訪我秦淮邊投我以新詩質我  
以舊篇曠代無此才鵷雛獨高騫因之出南郊僧舍聊  
周旋累日恣討論中夜猶未眠乍見不勝喜臨別忽淒  
然俯仰今昔間痛憤何由宣

七言古體

黃樓歌爲魏少府竟甫先生作

宋公戲馬臺已荒張公燕子樓亦亡不如蘇公此樓在  
五百年後形猶黃憶昔公爲徐州守芳春處處栽花柳  
一朝河決城幾陷埤堦隱見蛟龍走惟公憂患與民同  
親操畚鍤泥雨中涉旬水退城得保天子下詔旌其功  
因起黃樓東北角水土相制義誠確厥弟穎濱爲之賦  
太虛后山皆有作城頭樓勢鬱崔嵬河上望之如蓬萊  
公每賦詩寄朝士自矜其伐雄矣哉吾州下邑生劉季  
何況區區張與李重瞳遺跡已塵埃惟有黃樓臨泗水  
此四句吁嗟公去數百年黃樓摧頽不如前接踵豈無  
卽蘇詩賢太守登高覽眺心茫然栢鄉魏侯天下士受命治河

來守此緬懷古跡不勝情中間最愛二蘇子二蘇題咏  
滿黃樓安忍廢置如荒丘行歷城東得舊址慨然捐俸  
爲之修未及一年樓突兀恍疑金闕臨溟渤河中百神  
俱效順河上千艘任超忽層城刻木像二蘇四時禮祀  
羣黎趨豈直遊人恣玩賞實爲守令存師模是時我來  
自淮甸與君登樓日懽懽徐人知我是君客磨石鐫文  
待予撰我觀世間陵谷多遷移惟有文章政事永不衰  
斯民直道尚三代頌公明德非吾欺預知異代登樓者  
蘇魏齊名萬古垂

寒食日吳臨垣明府招同來伯中黃諸子登放鶴  
亭

去年寒食客榆關苦憶江南不得還今年幸已返南國

何爲又客徐淮間徐州自古名勝地出城卽有雲龍山  
山頭放鶴亭尚在昔人題咏苔蘚班吳君竹林雅好事  
提壺邀我同躋攀是日恰逢禁火節紛紛上塚人不閒  
忽憶故鄉千里外墓門荆棘誰爲刪祇緣里巷有豺虎  
遊子欲歸險且艱風塵南北豈得已臨水自照傷心顏

贈吳來伯別駕

彭城主人好客多美醞獨數吳寧波寧波釀法既有異  
封藏又復三年過尋常讌集甕不開開時必待嘉賓來  
我非嘉賓忝上座眼看琥珀盈金杯初一沾唇香味足  
三杯四杯春滿腹十杯已醉勿復斟扶杖出門身不  
主人謂客酒何如有暇時復來吾廬紅鱗紫蟹諒不乏  
况乃架上多奇書書任我觀酒任酌作客無如此間樂

但恐此客來太繁主人瓶空亦杜門

贈李孝乾孝廉

李先生年六十餘鄉舉乃在 熹廟初七上公車未釋  
褐歸來閉門惟讀書昔猶不仕况今代所以白首甘樵  
漁我到彭城訪耆舊先生家在雲龍後乍睹風儀自淳  
古重覽詩篇更蒼秀詰朝相約過君廬啖我香蔬飲我  
酎我聞漢之龔勝此州人寧死不肯臣莽新先生與龔  
同志操又能用晦全其身異時登眺雲龍者爭指山阿  
問逸民

飲萬瞿客樊桐堂感舊作歌

前年上君堂曾賦二客行今年上君堂二客分死生死  
者返其宅生者難爲情感此不能飲不飲空吞聲強起



移尊花下酌垂絲海棠半開落花落那能再上枝人老  
應無再少時君今妙齡宜努力莫將塵務嬰胸期世人  
汨沒塵中死若兄雖賢未免此何以洗塵多讀書能似  
若翁卽才子

瞿客乃年少之子遐客之弟也

### 七夕飲李笠鴻齋頭

憶昔芝田劉伯子與客西湖弄秋水遙望東南五色雲  
狂呼大叫烟波裏明年淮甸遇真人運籌帷幄如有神  
儒生裂土自君始至今子孫處海濱蹇予亦客西湖畔  
遙聞鞀鼓喧江岸畫船不許放中流藕花蒲葉空零亂  
野酌偏逢乞巧時坐當星漢露華滋主人醺酒更相勸  
朗詠犁眉數首詩

### 中秋日雨留別宗人秉虔

六月我來湖上遊屈指歸期在新秋豈知京口纏殺氣  
江程阻絕空懷憂假寓招提近城北滿城兵馬紛如織  
一月不出錢塘門獨坐僧房暗悽惻忽聞爾自黃山來  
移寓就我何快哉朝朝暮暮共尊酒佛前燈火雙徘徊  
因循遂至中秋節道路漸通吾欲別蕭蕭風雨惜離羣  
別後相思看明月

### 捉船行

吳閶一路兵捉船榜人奔竄蘆葦邊三日五日不敢出  
夜夜驚呼那得眠歸客蹉跎情自苦况復秋風亂秋雨  
荒洲無處覓飲食紫芋紅薑噉少許來朝風止雨亦晴  
大舟畏怯應難行急買小舫似鳬鴈間道溧陽趨石城  
石城用兵已兩月道途梗塞音書闕此行但保平安歸

以後遊踪勿輕發

喜陳伯璣移居相近贈此

我客江淮廿餘年年稅人居可憐今年始買白下宅  
桃葉渡口青谿偏其廬雖敝巷雖陋水光山色當門前  
我友陳君數過此深羨此地多林泉亦欲卜居鄰左右  
恰有鄭老餘一廛不惜兼金至十鎰今朝買得明朝遷  
牆外澄泓一陂水樓上宵靄千家烟望衡對宇半高士  
與我草舍尤相連有暇卽過過卽飲不論雪月風花天  
勸君且勿歸章江我亦不用歸桐川丈夫飄蕩逢世亂  
苟全性命遂終焉何必定種漢陰圃何必定耕南陽田  
閉戶著書各努力千秋萬歲名爭傳

題載花船短歌

爲張萬青作

龔山續集

後序

自古美人多不壽壽則紅顏漸衰醜不如年少化芳塵  
蛾眉千載尚如新我友張君本仙吏買得如花人並蒂  
秦川粵嶠遠相從蘭舟共載雙芙蓉那知樂事天所妬  
霜風一夜凋瓊樹人生有情誰能堪譜入新詞遍江南  
時時招客來羈旅一聽哀音淚如雨子平子肅各必傳  
不信但看載花船

五言今體

從兄繡山新居

城南又卜宅不離鳳凰臺自有山林趣何煩車馬來松  
筠多舊植梅菊况新栽春水盈池沼軒牕面面開  
悔作都門客風塵潤一年息肩來白下僦舍亦淮邊所  
願衡郭接長教枕被連秋成催釀酒相見卽陶然  
淮上遇潘江如有贈

舊遊如昨日彈指十三年只有蒹葭思渾無蔓草緣那  
知仲春月相遇大河邊喜極翻多感臨風一喟然  
曾聞江上信叅幕去南州性拙難干祿家貧易白頭一  
祿兵又占八口餒堪憂所幸兒婚畢徐圖五岳游  
不記金閨日烽烟白晝昏高樓逢越女小艇遁湖村患

難惟君共交游獨我存抱鴛人已矣淒絕更傷魂  
我欲彭城去心隨陽鳥飛故人忽相見行李詎能違  
借楊淹春夜停觴送夕暉淮南多好友且住勿言歸

補壽范眉生三十

步天醉韻

長淮風雅地小范最知名九月逢初度扁舟往潤城  
江山供睇笑賓從喜將迎何物觴君好吟詩和趙生  
同輩多衰白惟君正妙年讀書千卷破警句萬人傳  
復有養生術能如樂志篇虛名羞李郭終遜范滂賢  
欲師先少伯烟艇四時宜底事鶯花日都爲粉黛羈  
高秋來故國狹巷擁新姬處處沾香澤何須嘆遠離  
服藥非關病憂時感萬端逢場休戒酒捫腹且加餐  
濁世求榮易閒居免禍難祗應梅與竹不畏朔風寒

交態今時薄誰能久弗諼一人敦古處四海想成言偏  
愛龔山客相留幽草軒雖然闌闌裏渾不異郊原  
淮水通南北三年三度過停舟尋我友下榻宛烟蘿枕  
上吟聲熟樽前樂事多征途非不急爲爾故蹉跎

丘季貞社集西軒分韻

同集者潘江如張伯玉靳  
茶坡張虞山程斐東趙天

蕭范冒生  
倪天章

故人離索久淮上忽相逢不忍倉皇別且淹來去蹤高  
齋良燕會羣彥悉過從莫問河南北烟波路幾重  
數年前有願釣浦結茆菴得與同心友長爲竟夜談機  
緣終不偶離別意何堪稍喜經過此停舟一再探

題倪天章一草亭

茆齋手自闢幽曠若秋山淮甸且爲客清源何必還  
倪

人清良朋來海內名酒出花間知爾輕華屋貧居好是閒

彭城喜李條侯至

都門風雪夜古刹忽逢君片語成膠漆孤蹤各水雲黃  
樓期再晤碧澗許相聞明旦果驅策來尋猿鹿羣  
城南鐵佛寺荒僻似山中僧舍我先寓羈棲爾亦同晝  
行雙馬出夜話一燈終此會非容易他年思不窮  
英公山下路烟樹是君家前此未停櫂後來當看花吳  
兒解絲管楚水足魚蝦到日拚沉醉囊空莫漫嗟

陳善長五十初度

陳生天下士五十尚青袍世亂休言祿身閒雅自豪箕  
裘承祖德鉛槧教兒曹却笑朱翁子干時何太勞  
淹博徐人少惟君腹笥便燭知師曠秉耨似管寧穿好



客多藏酒謀生且種田不須求大藥高枕是延年

曉渡燕子磯

殘月四更出城中人未知可憐江上客正是渡江時風  
小波初靜天空露亦滋娟娟一片影幾日令人思

送汪我生內兄北征

高義輕榮祿閒居十五年俄驚公府檄又上孝廉船道  
在何妨仕時危且任天此心長炯炯不必蹈前賢  
昨歲遊燕薊風光異昔時羣公多戚戚外吏轉怡怡但  
得鄉閭近休嫌官職卑先人在慈水芳澤至今垂

石城曉發

淮南歸未久又作淝西遊客路雖嫌暑悲心不待秋閒  
身同野鶴小艇逐江鷗况值風帆駛須臾到潤州

晚泊京口不得上岸問談長益潘江如消息

談叟遊燕塞三年尚未歸潘生逢楚澤數日又相違妻  
子山中餓音書江上稀停舟不及問翹首悵依依

丹陽道中

離家纔幾日兩度夢柴荆自是老人態非關兒女情卜  
居今有宅賣藥可爲生便作終焉計來年罷遠行

立秋日范僉憲招集西湖

江上羽書急羣公相對愁使君何整暇召客飲新秋越  
國山川秀吳兒絲管悠曲終懽未已暮角起城樓

立秋前一日與龔孝緒泛舟湖上

秋水一孤艇夏雲千萬山涼生檳樹底香動藕花間江  
雨忽然至岑城未可還君家分半榻重與醉柴關

靈隱寺喜遇願雲禪兄

是日卽其五十初度

雲居山頂宿彈指七年餘  
鄙渚難重權門人數寄書雪  
鴻飛不定靈鷲忽相於  
懽劇那能別香林且飯蔬  
問年剛半百嶽降是茲辰  
夙慧開天眼名儒轉法輪  
漫勞分孔墨持此報君親  
只恐秋陽曝終非補衲人

飛來峯

島嶼若憑空雲根到處通  
何年來海上獨戀此山中  
黑白二猿在陰晴萬樹同  
所嗟塵世客遊覽太匆匆

吟泉亭

天竺下山路皆從靈隱過  
此亭臨澗壑之子任婆娑  
松檜夏偏密樵蘇晚更多  
當年白少傅高咏意如何

香山有冷

泉亭

詩

六月廿六日內人初度予不及歸寄此

今日是何日細君懸悅辰無端來海嶠不及返江濱孤  
櫂偏留客雙魚也笑人早知爲客苦何似在家貧  
外家親不少此日定相過只恐驚烽火無心訪薜蘿同  
居有娣姒小酌且婆娑歸路元非遠其如阻絕何  
忽報南都外沿江列戰船移家才帖息逢亂又顛連汝  
是閩中子猶知醉後天他家願富貴妾願老林泉  
青溪桃葉渡新買一精廬合與汝偕隱雅堪吾著書池  
塘收衆水園圃植嘉蔬便作於陵子長貧亦晏如

贈張卿子先生

誰謂張公老修髯白未勻著書垂異代采藥救民道體  
忙愈健詩篇瘦有神春秋七十六還似少年人

名園藏委巷小閣對芳塘靜聽兒孫讀微聞草木香客  
來留一醉運去感繁霜况復明朝別悠悠江水長

贈劉望之

劉生絕嗜慾又復斷暈腥祗合歸禪悅何緣屏佛經風  
騷多解注湖海任飄零古道今如土斯人見典型  
聞君棲破寺僮僕亦蕭然密邇惟諸陸淹留已數年我  
來秋雨夜得與對牀眠茗粥差堪飽何勞費酒錢

太湖避兵

將近楓橋路惟聞人語喧北來兵肆掠東去艇皆奔震  
澤烟波迴高秋風雨繁此時期免患艱苦復何論  
痛此一區水吳盧曾用兵風期豈不烈氣數莫能爭霜  
樹先朝事雲峯異代名可憐懷舊者夢裏見平生

喜胡逸菴見訪感舊

逸菴居蕪湖之塔塘其子日觀子門人也

塔影塘邊路當年幾度過傾杯情不淺指廩貺尤多秋  
樹飄黃葉春江冷白波九年才一晤欣慨意如何  
風雅蕪陰盛君才亦斐然故人千里夢今夜一牀眠語  
不離詩外愁應破酒前阿戎吾所畏家法自能傳

牛首雜咏

不上牛頭寺蹉跎十九年本來無住着何事亦拘牽客  
久少閒日冬晴趣好天相將出南郭驢背意欣然  
行行剛數里恰遇在山僧迴駕爲吾導攀蘿知爾能風  
光剩南畝松栢宛西陵不似丹陽路牛車層復層  
策蹇到山麓西峯正夕陽路緣危磴上寺比昔年荒倦  
且憇僧閣明當禮覺皇厨人供脫粟蔬筍味偏香

吾兄輕仕宦五十便懸車出世意雖切遊山興轉疎今

宵臥雲壑將晚聽鐘魚始悟昆尼理塵襟頓掃除

是日與繡

山從兄同宿僧舍

林端日初出徐步躡山椒疊嶂名天闕興雲拱聖朝蔣

山猶在眼紫氣未全消愁殺朔風急松根葉亂飄

文殊古洞後石壁最嶙峋開士新藏骨愚夫妄捨身入

山曾有約問法已無因半偈題遺像依稀見此人

鐵漢師屢

招予上牛首不果今亡矣蓋舍身崖

散步出門外雲梯百八重緇衣引幽徑黃葉沒行蹤水

涸桃花澗牕臨獅子峯古藤更奇絕纏殺數株松

寺西有桃

花澗其下爲獅子峯

空林聞犬吠二客啟柴門指畫山川勢摩娑松檜根

友人

胡星卿精  
形家言

暗牕窺塔影枯井汲泉源茗粥非容易將何

報佛恩

宗風傳懶祖地以祖堂名相去路非遠焉能罷此行况

聞耆舊在益起具瞻情明夜高峯宿焚香心更清

牛首  
開山

者懶融師也住祖堂  
山今楚僧石溪寓此

石公跌坐處萬念總銷磨几上烟雲起胸中丘壑多祗

應長待此無奈欲歸何山路往來熟非時取次過

雪後杜蒼畧吳素夫父子見過限韻

卜居雖不廣小閣俯秦淮幾夜雪平岸初晴泥滿街何

人肯相訪之子况能偕無事且深坐高吟愜我懷

貧家無旨蓄何以禦殘冬幸有杯中物遙看江上峯開

情惟故舊乘興每過從莫慮歸途暝城隅寺未鐘



七言今體

元旦試筆

北遊已作無家別，不意南歸又有家。  
匝地霜風俱落葉，傍巖寒木始生花。  
故鄉未可容漁釣，新婦猶堪挽鹿車。  
但使熊羆來入夢，商瞿五十復何嗟。

早春三日沈仲連移尊顧與治宅招同陳伯璣曾  
止山諸子各賦一詩

前年霜雪寓淮陰，除夕相過感慨深。  
今又江南逢改歲，特來花下散愁心。  
飄零俱是四方客，衰白何堪兩鬢侵。  
屈指長干春色好，松風木末再招尋。

松風閣名  
木末亭名

送方干霄兵憲之任粵東

使君乘傳向南溟，取道京江檝暫停。  
桃葉渡頭尋隱逸，

雨花臺畔得娉婷酒如寒水千重碧眉似春山一縷青  
到日明珠還合浦定知懷抱有寧馨

時干霄納金陵姬

客歲都門風雪天與君館舍恰相連隨時痛飲雖云樂  
獨臥空房亦可憐官轉外臺同執法香添侍女宛神仙  
故人不得來分俸白葛丹砂寄估船

杜詩交趾丹砂重  
韶州白葛輕時因

估人便一  
寄錦官城

### 上巳宿房村懷吳八中黃

二月揚舡過楚州豫知修禊在黃樓那堪中道逢陰雨  
空惜佳辰逐水流驢背吟身無依着橋頭村店且歸休  
來朝想到吳郎宅定有香醪破客愁

### 重至彭城訪魏竟甫少府

前年驅策上皇州取道彭城一暫留顧我嚴寒猶短褐

荷君高義贈重裘雲龍山下吟聲壯馴鶴亭中禮數優

及到都門逢令弟三人推分亦綢繆

令弟石生總憲辨若面乙二考廉

羣從伶仃劇可憐得爲書記意翩翩豈知弱質先朝露

未報弘恩已下泉紫塞乍聞心痛絕黃河重渡淚潸然

公庭一謝雲霄誼不似修江乞酒錢

從子公敏死于少尹幕中故云

### 哭萬二遐客

曾爲秋玉堂中客攜酒南山送遠人此日交遊俱在眼

惟君奄逝獨傷神黃河慘澹疑無色鴻鴈呼號失所親

衣袖隰西痕未滅又添多少淚痕新

萬年少別號隰西遐客之叔也

### 送徐二克任歸吳門

彭城賓客盛如雲文采風流誰似君畫裏烟巒偏秀發

句中蘭茝亦清芬提壺只合臨春水折柳那堪對夕曛

崑山續集

徐叔遊草

十七

期我新秋到吳市山塘歌吹日相聞

喜馬三嘉甫至

我入都門君出都風塵相識在須臾長懷舊侶應難見  
不意茲遊得與俱石狗湖邊尋古蹟雲龍山下訪潛夫  
閒身且莫傷流落回首京華是畏途

荅李司直見贈兼懷于息菴先生

新詩贈我似瑤琴欲報慙無玳瑁簪且喜彭門爲酒伴  
忽聞杜宇動歸心風塵奔走何時息烟水蒼茫此處尋  
借問高人在巖穴十年懷思到於今

奉別李觀察漑林先生

二十年來江海遊交情誰似使君稠曾於熙水分困粟  
又向彭城贈麥舟黃爵有知猶解感玄駒無力那能酬

南歸定買青溪宅懷溉名堂在上頭

將去彭城前一日別韋佩二

黃茆岡下草萋萋我去君來路不迷  
旅次相逢聊聚集貧交未忍遽分離  
新詩出篋清如綺別酒傾壺醉似泥  
明日南歸仍見訪鳳臺東畔雀橋西

閻百詩送予至平河橋兼示剩道人句

前過平河趁順風未曾登岸恨匆匆  
歸時竹巷先相訪翌日蘭舟許暫同  
况有新詩來塞上誰傳異寶到南中  
冰池雪窖心猶熱始信彌天一剩公

李研齋太史杜蒼畧山人暑中見過限韻

雞鳴山下美人家我欲從之道路賒  
短棹忽過桃葉渡小園先看石榴花  
一瓢冷飲煩襟滌衆樹濃陰畏日斜

安得青溪同買宅草堂朝夕對茶灰

周伯衡副憲招同康小范陳伯璣倪闇公諸子小

集

石城歸棹自虔州千里江山一瞬收詩思高於天際鶴  
宦情閒似水中鷗星輶畏暑停南國梅雨邀賓聚北樓  
堦下素馨花爛熳可能分惠一枝不

姑蘇柬吳司理錦雯

吳生本是采薇人捧檄之官只爲親祿養早知無半載  
巖棲何不竟終身倉皇解組師陶令寂寞懷芳類楚臣  
獨惜金山詩句苦臨當剗剗又因循

錦雯方爲予刻詩以罷官不果

贈徐松之兼悼亡友史弱翁徐掌文

八年前見懷音集間氣英靈總不如

懷音集松之所輯也做中興間氣河

獻英靈  
選法

惟爾貧家好梨棗搜人麗句比瓊琚曾游石臼

舟相左

徐曾訪于于  
高淳不值

直到金閶願始舒回首舊交零落

盡西濛亭館亦丘墟

西濛地名  
史徐所居

虎丘遇吳岱觀因偕姚仙期徐松之小飲達曙

侵曉來遊海湧峯言歸直到日西春長堤正苦無船附  
中道誰知與爾逢且莫移舟違野岸卽教沽酒話離悰  
聞雞又欲匆匆別回首烟波幾萬重

吳江訪顧茂倫

垂虹橋畔日初斜有客停舟問爾家鄉里皆知是耆舊

詩篇誰不誦英華

茂倫方刻唐  
詩英華行世

門臨流水仍環樹月上

空庭且醉茶廿載離思今始慰明朝烟艇又咿啞

武林訪徐月鹿水部

使者乘輅出舊京遊蹤先去北平城蘭舟共載虛前約  
菲店相思有嘆聲隔歲才能來水國過期又欲轉王程  
湖山深處堪延賞赤日炎風且慢行

訪李笠鴻

秋舫歸自莫愁湖又買西陵宅一區僻地重開浣花徑  
深閨雙產夜光珠琴書有托何妨老賓從相過合與娛  
我亦明年四十九不知能步後塵無

笠鴻長予一歲  
是年連舉二十

訪胡彥遠

未到西陵先問君幽棲不使世人聞城隅野徑尋三日  
樹裏炊烟識五雲倏聽叩門聲自喜忙呼賒酒意何殷  
旅堂且坐消炎暑蕭寺言歸待夕曛

彥遠所居  
名旅堂

西湖廣化寺前樓崇祀近代死難諸公一日與客



停舟登此徘徊久之蓋忠毅左公浮丘先生文  
烈汪公長源先生皆予外舅也因題一詩於壁  
危樓迴出聖湖西上有羣賢木主齊弘正以前猶隸側  
謂于忠肅天崇之末自酸嘶兩公更切維桑誼二女同  
孫忠烈爲采蕨妻身賤敢言冰與玉岱宗或不愧攀躋

壽吳靜庵先生七十

神廟初年君蹶生當時四海樂昇平豈知白首偏逢亂  
猶喜青山未輟耕家有機雲傳舊業才如卓魯著專城  
鷹揚若是皤溪叟此際垂竿竹尚輕

飲陸麗京齋頭因與劉望之留宿

賣藥長年在海濱偶因殯妹入城闌布袍不與羣公接  
蔬酌偏于舊友親旅寺欲歸愁路暝書堂留宿見情真

中宵風雨聲淒切俱是蕭蕭槭槭人

錢塘慕明府雨中見過

有客懷歸歸未能棲遲荒利似孤僧  
新秋况值蕭蕭雨長夜誰依黯黯燈  
忽報軒車來北郭也知恩澤徧西陵  
時危不敢勞分俸乞與京江一葦乘

留別范文白

陸大行家共酒卮與君深夜細論詩  
滄桑十七年如夢鬚髯數千莖已絲  
東海難尋招飲處西泠相遇解維時  
袖中短冊勞題贈別後依稀見所思

中秋後一日飲沈冠東學博齋頭

茲辰準擬去西湖出郭聞兵又稍須  
况有故人邀賞月不嫌遊子慎歸途  
中庭白桂花初放鄰舍黃公酒易沽

愁殺軍城鳴夜柝當筵欲別幾踟躕

贈沈御冷宏度

沈家兄弟雙鳳雛逢世難羞爲儒寧甘黃髮歷齒老  
弗肯躍馬乘軒趨同心况復有錢陸少年相約歌農虞  
願爾努力事風雅不然無異山澤癯

白下逢朱子葆感舊

青溪烟雨憶昔遊與君醉臥溪上樓神州倏忽變滄海  
故人強半歸荒丘謂吳次尾王穆如晨星落落二三子霜水茫  
茫十五秋今夜雨牕重對酒蔣山一望淚雙流

李三石自京口至

君去南徐一月回江山流覽興悠哉况逢處士潘錢在  
江如叙少又值詩人范趙來眉生天醉采菊定尋甘露寺觀潮重

上妙高臺慙予未及同舟往旅次寒燈獨舉杯

牛首山頂望南村

曾聞白下父老語至寶莫如南鄉田近水土膏最腴澤  
傍山村路多芊眠兵戈不見離亂苦丘壠尚剩侯王阡  
何年得買三十畝茅茨自結松筠邊

祖堂待月

尋山不及望舒時蟾兔何妨四五遲  
牕外千峯如水墨  
佛前一點是琉璃微茫漸見東林白  
皎潔先從上界窺  
此際下方人睡熟霜華月色有誰知

沈子遷五十初度招同張屬笈孫阿漚紀伯紫集  
興善庵

初度如何不在家家人介壽覺喧譁霜江盪漿來京國

野寺焚香誦法華況有良朋同嘯咏莫將市酒溷茶瓜  
餘年若肯師高適從此攻詩力正賒

顧與治齋頭話舊

屈指貧交三十年少時相愛老相憐江邊置產渾無計  
門外求書尚有錢腰痛那能還客拜朋來只可對牀眠  
新詩珍重休拋却留與千秋人共傳

張古岳侍御見過

張乃先司農之門人也

卜居深巷似山村歲暮無營獨掩門忽有巾車來菜圃  
正如晴雪落松根青氍不忘先人義白首猶懷知己恩  
顧我荒廚終日冷可能推食飯王孫

冬日種花

年來漂泊總無家雖借人居亦種花今有一廛餘隙地

肯教三徑委泥沙開春桃杏當牕秀入夏葵榴滿院遮  
幽意獨憐梅與竹霜天雪月更堪誇

李雲田見訪並攜談長益書至

抱甕丘園久息機忽聞楚客叩柴扉袖中詩有烟霞氣  
語次風生薜荔衣遠道爲傳吾友信奇蹤真覺世人稀  
潤州城破家家哭此老如何竟不歸

五言排律

移居宋家園 三十韻

宋公吾父執關館號鷗天少小曾遊此園林正蔚然亂  
更三四主別至廿餘年門巷雖仍舊風光迥異前偶而  
來一問居者又將遷善價歸予手幽棲絕世緣圃畦聊  
自種蔬菜不須錢墻破憑籬補牕稀賴竹編杏榴開可  
玩榆柳伐堪憐從此加培植奚難再鬱芊仲冬陽始復  
幾望月初圓徙自城南廡家於巷北屢孤踪有寄托盡  
室得安全夜讀層樓下朝行曲岸邊鐘聲殷古寺草色  
媚晴川仰首蔣山近傷心淮水偏比鄰多隱逸隨分與  
周旋墨妙家家有詩神處處傳老猶貪酒醖貧不斷炊  
烟况賣嚴京卜兼通素難篇細君催釀黍小婢解烹泉

客到嘗留醉吟成每共眠胸中自浩落身外曷憂煎所  
願熊羆夢惟期豚犬牽裴顏才足慰書種但能延便入  
金陵籍長耕建業田春波桃葉渡秋浦藕花船白首恣  
行樂芳塵繼昔賢懷刑知免矣抱道合終焉敢望宋公  
子鳴珂侍講筵

宋公如園先生也與先司農葵卯同門  
公于其武方爲經筵學士



七言絕句

金陵感懷十首

崇禎初年予應京兆試南都風景居然全盛也  
甲戌乙亥避流寇之亂徙家於此凡十一年故  
白下山水游覽頗熟乙酉世變予卽歸桐戌戌  
冬重來此城郭人民大抵如舊惟蔣山雀湖等  
處非復當年矣撫今追昔感歎不勝因作此詩

蔣山

鬱鬱葱葱數百年  
千尋枯栢上參天  
不知何事凋零盡  
惟有春風泣杜鵑

燕雀湖

我祖填湖作禁城  
九重宮闕儼咸京  
黃扉碧瓦今何在  
依舊白波青草生

玄武湖

官家築室後湖中三百年來版籍克故紙幾何渾賣盡  
鯽魚菱藕一時空

孝陵衛

當年軍衛百千家此日離披似落花猶有兩般人未改

孝陵棉與孝陵紗

南中賣木棉賣機紗者多孝陵衛人

觀象臺

自古占星重此臺璿璣一旦委蒿萊古銅欲賣無人售  
拋却城隅見者哀

國子監

太學師儒體統尊往年多士擁橋門如今祭酒爲司訓  
官舍不如原上村

大功坊

開國分封異姓王中山獨建大功坊何年改作藩司署  
公子流離泣路傍

正學祠

正學先生十族墳祠堂軒豁樹如雲可憐樹伐祠因廢  
每夜啼烏不忍聞

表臣祠

表忠祠與冶山鄰崇祀方黃一輩人多少閒房偏拆此  
世情元不愛忠臣

舊院

文德橋邊亭館幽六朝風韻未全收那堪蕩析爲平地  
白草黃花無限愁

雪後渡黃河

龔山續集

卷之五

作客偏逢雨雪天  
衝寒又上大河船  
聞人此日遙相憶  
只道紅樓擁妓眠

寒食

河北從來節候遲  
春歸才是看花時  
今年况復閏三月  
寒食全無花一枝

李孝乾家賞白牡丹

客中桃李亦堪觀  
况是芳亭白牡丹  
兩日頻來君莫厭  
只愁風雨易摧殘

送張楚材之碭山

芒碭山中草樹春  
聞君欲去又因循  
當年五色雲何在  
只恐今無隱遁人

驢背馳驅正夕陽  
路人猶指斬蛇岡  
岡頭買酒憑君醉

劉四朱三總斷腸

漢高帝行四朱  
孟行三皆徐人

贈徐生

生妙于音律

霓裳仙樂自誰傳老去猶能被管絃  
莫話開元天寶事令人腸斷李龜年  
短笛橫吹最有情況於溪上月華明  
祇宜楊柳梅花曲莫作摩訶兜勒聲

湖上觀劇

誰譜新詞忌諱無優伶傳播到西湖  
驚心最是張方伯不敢重看鐵冠圖

與晦公坐三生石

侵曉尋山露氣新三生石上話前因  
不須身後才相見猶是歸宗寺裏人

公與予曾住  
廬山歸宗寺

別龔二孝緒

秋來兵卒阻重城孤負湖山一月晴今日樓頭聊騁望  
西風又欲送人行

題問旭上人畫

千尋絕壁俯溪流有客揚舲自泳游日暮碧雲天際合  
無邊詩思屬湯休

寄蔡四芹溪

十年不見蔡芹溪溪上浮萍東復西今日逢君鄉里客  
一行書信數行啼

裁書何事淚潸然我老君尤長幾年身賤家貧聊自遣  
不應詩禮尚無傳

魯游草序

夔州李長祥撰

李供奉蜀人也蜀山水之奇供奉詩不及焉杜工部在蜀亦惟瞿唐劔閣有詩耳以峨眉之奇而工部不及焉供奉則有峨眉詩然僅一絕句其游山東也有泰山詩五首而孔廟不及焉工部則俱不及其在任城止望嶽一首耳古之人於詩其思力之所至則爲之其不爲者想亦其思力有所未至也爾止先生游山東盡覽泰山孔廟之勝無不有詩予訪之哺雛軒出以示予予懷歸得讀竟日大約爽爽朗朗不煩鉤索自然工妙然則其思與力殆有過於古之人者耶楚人杜于皇與予言詩最洽因並讀爾止詩各爲之序蓋天下之知爾止者以

詩知爾止之詩者不止於此而讀此詩者亦可以知爾止矣



魯游草序

黃岡杜 濬撰

三十年以前余至金陵交游多老蒼相與唱和宴游馳騁上下其議論者有龍眠數子而余與爾止尤傲睨其間是時畧未聞道徒以年少負才逞奇好辯必屈伏人而後已諸老蒼顧益重之以爲此人旦晚公卿耳無何變亂接踵十數年來諸老蒼消磨殆盡而余與爾止公卿夢絕亦居然老蒼焉蓋前後之脉中斷識吾兩人者已鮮吾遂頽然順之加以飢寒憂患骨肉之痛百念灰冷噤不敢發聲而爾止獨不然剛正之氣百折不回往往譙議余之委靡雖中間亦構奇禍然蹶而復起前年北走燕今年又東游齊魯以爲詩人不登泰山謁孔林

眼界終不寬題目終不大也於是賦詩數百篇滄海日出闕里風規盡收筆底歸以示余余讀一過覺已灰之心忤忤欲動因書此數語于篇首蓋欲使覽者涉流尋源俛仰今昔足以知爾止之可敬而余之可感也夫

魯游草序

福州八二叟林古度撰

萬曆丙辰予與鍾伯敬吳康虞同登泰山各有詩鏤石  
今四十五年矣庚子秋吾友方爾止從泰山歸言從荒  
荆蔓草中重爲摹榻持以贈予予展視欷歔恍如隔世  
旣爲詩以酬之而爾止又出其燕游魯游二草屬予序  
序曰今天下不可游矣若爾止之游似又未嘗不可也  
蓋天下人之游游於利名場中仰面屈膝于人而人莫  
應此非人塞其游先自覺其游之不廣故多怨悵而無  
所適從焉爾止挾三尺劒一囊書北游燕趙東游齊魯  
弔古於金臺盧龍望先朝之宮闕潺湲出涕已又登岱  
宗謁孔林恭敬肅將因而長吟短詠發摠其胸臆卽有

一二地主款曲流連酣歌豪飲論騷說雅皆是其生平  
舊交攀留不舍者非懷刺彈鋏妄爲干謁以取厭棄者  
比也故其北都東郡之詩浩浩落落寄托蕭遠不怨不  
怒使人讀之如少陵奉先北征諸作當年情事歷歷如  
在目前然則爾止之游直如未嘗游者矣且爾止雄心  
壯氣年五十而不衰正如高適之學詩商瞿之生子卜  
居雨花桃葉間予雖老耄猶得奉周旋於晨夕側觀其  
著書教子俾承家學永遠勿替是集也豈非爾止之墨  
莊也耶